


NUOVO LIRUTI - Publicade la **seconde part dal dizionari** che al cjape sù **lis biografiis di personaçs** preseâts dal timp sot **dal domini venezian**.

» DI LISA ZANCANER

I Vip ai tims de Serenissime



"La deposizion"
di Pomponio Amalteo,
artist furlan
innomenât de ete venite

Al rive il secont volum dal "Gnûf Liruti, il Dizionari biografic dai furlans": 2.850 pagjinis, 1000 vòs, nons innomenâts dal Friûl cun 33 pagjinis dedeadis dome ai lôr nons. La opare e rapresente la sprolungje dal ampli progjet "Gnûf Liruti", scomençât intal 2006 cu la publicazion dal prin volum dedeâar ae Ete di Mieç e al cjape sù lis biografiis dai personaçs che a àn dât un contribût impuartant ae culture furlane in etât venite, dal 1420 al Tratât di Cjampfuarmit dal 1797.

A chest secont volum, editât de cjase editore universitaria udinese Forum, a àn lavorât 120 studiôs taliâns. Al è un strument fondamentâl di consultazion storiche, leterarie e biografiche.

TRADIZION E MODERNITÂT

Naturalmentri dut il lavôr al cjape ispirazion di Gian Giuseppe Liruti che tal Sietcent al cjapà sù lis biografiis dai furlans plui preseâts. La opare, curade di **Cesare Scalon**, **Claudio Griggio** e **Ugo Rozzo**, ducj professôrs ae universi-

tât, e à impegnât vot agns di lavôr e pal 2011 - a sigurin i studiôs - al sarà pront il tierç volum che al cjape dentri i personaçs dal Nûfcent. Il Dizionari si indreçe a ducj i furlans, no dome studiôs, par vè una panoramiche de culture furlane.

CANTÏR DI RICERCJE

L'assessôr regionâl ae culture **Roberto Molinaro** lu à clamât "une imprese monumentâl, un lavôr inovatîf di ricercje che al met adun la storie de nestre tiere inte ete venite dal Friûl. Propit in cheste ete - al marche - la lenghe furlane si è disvilupade in produziions leterariis dai grancj personaçs che si cjatin tal Dizionari". Pal president de Provincie **Pieri Fontanin** il *Gnûf Liruti* "al jude i furlans a vè plui stime de lôr identitât e te lôr memorie". "La storie furlane - al conte **Adriano Proserpi**, storic ae Scuele normâl superiôr di Pisa - e je un grant cantîr di ricercje pai studiôs di dut il mont parcè che cheste aree di confin, di passaç di tante int e à produsût grancj personaçs. La continuitât jenfri il vecjo e il gnûf Liruti e je la idee di identitât furlane. Liruti al à cirût di tornâ a fâ sù lis rêts culturâls e politicis tiessudis sul teritori. Rêts che a metevin in comunicazion il Friûl cul rest de Europe, fasint de nestre regjon une tiere di bon acet". "Ancje se le opare e puarte indenat un lavôr scomençât di Liruti tal Sietcent - al displee Claudio Griggio - e je costruide cun criteris modernis".

"La continuitât jenfri il vecjo e il gnûf Liruti e je la idee di identitât furlane"



ilfriuli@ilfriuli.it